

**Sulinermik inuussutissarsiuteqartut sulinerup nalaani ullormut minuttini 30-ni timigissarsinnaatitaalissappata tamatuma namminersorlutik inuussutissarsiuteqartunut pisortanullu aningaasatigut allaffissornikkullu kingunerisassaani misissuinermik aallartitsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi taamatutaaq tamatuma innuttaasut peqqissusiannut kingunerisassai taamatullu aamma inooriaatsimik pissuteqartumik nappaatit appariarnissaasa naatsorsuutigineqartup malitsigisaanik napparsimalluni sulinngitsoortarnerit Peqqinnissaqarfimmullu aningaasartuutit ikinnerulernerisa inuiaqatigiit aningaasaqarniarnerannut sunniutissai qulaajarneqassapput.**  
(Inatsisartunut ilaasortaq Anna Wangenheim, Demokraatit)

### **Akissuteqaat**

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq)

### **Siullermeerneqarnera**

Sulinerup nalaani ullormut minutsini 30-ni timigissartarnissaq pillugu siunnersuummut Naalakkersuisut sinnerlugit Inatsisartunut ilaasortamut Anna Wangenheimimut qujassuteqarpunga.

2020-mi § 37 naapertorlugu apeqqummut atatillugu nassuiaatigineqarpoq, sulinerup nalaani minutsit 30-t timigissartoqartalissappat tamatuma pisortanut aningaasaqarnikkut kingunerisassai qanoq akeqassanersut, inernera tassaalluni 46 mio. kr-it. Sulisunut aningaasartuutit, soorlu timigissarnermi sammisat pillugit sulisut aaqqissuisussat nakkutilliisussallu, uffarneq, atisat taarserneri sungiusarnermullu atortuusinnaasut naatsorsuinermut ilanngunneqanngillat. Tassunga ilanngullugu timigissarnerup akilerneqarluni atuutlernissaa namminersorlutik inuussutissarsiortunut qanoq akeqassanersoq pillugu misissuisoqanngilaq, nalorninarloqarpallaarmat.

Allaffissorneq naatsorsorneqanngilaq, piviusunngortitsinerup atatillugu suliffeqarfinnut tamanut, soorlu suliffeqarfimmi politikkimut, sulisut quppersagaannut, attaveqatigiinnikkut suliniuteqarnermut eqquutititsinerimullu, assigiinngitsussaammata.

Pingaarnertut isigissagaanni sulinerup nalaani timi atorlugu sammisaqartitsineq peqqissutsimut ajunngitsumik iluaqutaasinnaavoq, kisianni suliniut "Suliffeqarfiit Peqqinnarnerusut" takutippaa, imigassamik aalakoornartortalimmik atuinermik pujortarnermillu ajornartorsiutit katitigaasut suliffeqarnermut atassuteqartinneqartut pillugit tamakkiisumik aaqqiissutaasinnaagunangilaq. Suli annertunerusumik aallaaveqarneq, taamatut pissusilersornermut itinerusumik tunngaviusunut sammitinneqartut aamma suliffimmi peqqinnartumik avatangiiseqarnermik siuarsaasut, siunissami ungasinnerusumi inuiaqatigiinnut aningaasaqarnermullu tamakkiisumik iluaqutaasinnaanannut pisariaqarsinnaapput.

Napparsimalluni sulinngitsoortarnermut peqqinnissaqarfimmullu aningaasartuutitut pingaaruteqarneranut atatillugu apeqquut akissuteqarfiginiarlugu, piviusunngortitsinerup sunniuteqarnera ingerlaavartumillu nalilersorneqartariaqarnera pingaaruteqassaaq, tamannalu paasissutissanik katersineq pingaartuuvoq. Taamaalilluni aamma ilanngullugu eqqarsaatigineqassaaq qulaani allassimasunut saniatigut aningaasartuuteqarsinnaaneq.

Kalaallit Nunaanni Timersortartut Peqatigiiffiisa Kattuffiata periusissiaa 2023-meersoq suliffeqarfiit eqeersimaartut pillugit imaqarpoq. Suliffeqarfinni peqqinnarnerusumik allannguineranut siuarsaanissamut ikorfartuinissamullu siunertaqarpoq, peqqissutsimut tunngasunik sammisaqartitsinerup pitsaassusaanik annertusarniarlugit sulisut peqqinnerannik atugarissaarnerannillu pingaartitsisoq. Tamatuma saniatigut Aalasa 2030-mi nuna timimik aalatitsiffiunerpaanngornissaanut suliniuteqarpoq. Naalakkersuisut isumaqarput suliniutit taakkua timigissarneq pillugu eqqumaffiginninnermut suliffeqarfinnilu sammisaqartitsinermut iluaqutaareersut.

2017-imi Qeqqata Kommuniiani suliniut “Suliffeqarfiit Peqqinnarnerusut” aallarnisarneqarpoq siunertaavorlu suliffeqarfinni peqqinnissamik atugarissaarnermillu suliaqarnermi ikorfartuinikkut inuiaqatigiit peqqinnerulernissaannik siuarsaanissaq. Suliniummi inuummarissaasunik ilinniartitaaneq, peqqissutsimik aqutsineq suliffeqarfinnilu peqqinnartunik iliuuseqarnernik piviusunngortitsinerit qitiutinneqarput. Suliniutip ilaatigut takutippaa peqqissutsimut suliniummik suliffeqarfinni timigissarneq peqqinnissamillu sammisaqarneq iluatsinnissaanut suliffeqarfinni aqutsisut tapersersuinerat pingaartuusoq.

Naalakkersuisut isumaqarput suliffeqarfimmi timi atorlugu sammisassanik siuarsaaneq sulisut peqqinnerannut atugarissaarnerannullu pingaaruteqartoq. Suliffeqarfiit sulisut tamarmik peqqissusaannik atugarissaarnerannillu ikorfartuisunik politikkinik piviusunngortitsinissamut akisussaaffeqarput, aamma suliffeqarfimmi timit atorlugu sammisassanik siuarsaanissamut suliffeqarfippassuit alloriareerput.

Naalakkersuisut sulisitsisup sulisartullu akornanni pissutsinut akulerunniangillat, aamma sammisap oqallisiginissaanut suliffeqarfimmi illuatungeriit suliassarigaat isumaqarlutik. Allatut oqaatigalugu, pissutaasut qulaani taaneqartut tunngavigalugit siunnersuut itigartitsissutigineqarnissaa Naalakkersuisut inassutigaa.